

青
城
縣
志

第五冊

藝文志
上

青城續修縣志第五冊

藝文志 上

山左文人遞興一盛於邊廷實再盛於李滄溟青邑密邇
濟南流風餘韻漸被者深故立言具有原本其工者深醇
大雅卓卓可傳次或持論時有出入亦足以觀風氣之正
變辨古學之源流揚芳擷藻各成一家可不謂人文之盛
歟第撰著不能備載故今但就其關於一邑實事人物者
錄之而分爲上下卷云輯藝文志

元

青城縣學廟記略

中書省
詳定官楊

威海豐人

天地覆載日月照臨有聖者出焉以君臨天下如堯舜禹湯文武周公聖聖相承使父子有恩君臣有義長幼有序夫婦有別是以天下輯穆故無爭端暨周德既衰諸侯放恣不君其君不父其父不子其子人事幾汨如也上帝鑒之乃生吾孔子者繼堯舜禹湯文武周公之道刪詩書定禮樂繫周易作春秋亘千萬世不惑正道者是吾聖人贊天地也故無天地不覆載無日月不照臨無聖人之教不能正天下之大義果使無孔子者邪說妄行易教改法則爲魍魎魍魎也久矣是以天下郡國皆立廟而祀焉大行於天下南北千里山之東海之西有邑曰青城縣今屬河間是邑也地當川會民淳俗厚號爲易治而蟾公蒞

之三月政成暇日語及僚吏曰夫君君臣臣父父子子仁義之道皆自孔子教中出治下諸祠皆有惟吾聖人之廟未之立闕典甚矣吾欲剏之公等意若何於是僚吏軍民同辭一口敬遵公命願剏吾聖人孔子之廟所用不強於民惟人心自聽積日累月廟殿告成所費不計皆出於願剏學舍新講堂使學者有所歸仰云

明

剏雕宣聖遺像記略

教諭 夏 聰

聖朝崇大儒教內而京畿外而郡邑暨諸軍國夷服莫不置學有聖賢廟像薦享於春秋修謁於朔望典禮隆矣青城縣學廟

建甫百年像塑不載載而復剝落者土鹺地潤薄於海濱故也
前令深澤宋溫懲其弊欲易以木未果而丁內艱事遂寢天順
甲申大成殿復建規模宏深並非故像所能稱矧無哲位義弗
容弗作聰乃具前議謀於少令餘于王翰暨判簿司訓諸君子
偕是其計乃遍白邑中長者得布粟若干復得大木數十於邑
民陳興輩料完價備食亦且足獨雕繪難其人詢於衆僉曰侯
昇氏江右良工時客於濟因延之語以祖庭之記萇弘之贊使
知先聖容表暨像成儼然如在復作顏曾思孟四公配享閔冉
以下十哲左右而序位焉擬諸故像數增而制備矣是不可無
記

重修青城聖廟記略

戶科給事中

巴思明

新城人

古青城齊地居於齊之西北隅齊川經其西會仙峙其南土膏而平民殷而富既富矣又何加焉曰教之而文宣王廟實肇於元之至元二十有六年新時也吾道晦而不明否而不振逮我聖祖高皇帝龍飛淮甸首重斯文至正統庚申而青城文廟始大成焉後天順甲申再加崇飾今閱歲久殿堂門廡樓亭齋厨日就於敝揆厥所自咎在有司正德丁丑歲邑侯盧陽高廷弼由鄉薦來令茲土初謁廟目擊頽敝銳意修葺以爲吾夫子之道在天下國家不可一日廢焉者學校吾道所出之地而士類則吾道所寄之人也修理學校所以甄陶士類正所以培植吾

道也然構大厦者必資於羣才成大計者不惜乎小費於是謀諸僚佐主簿曹伯勤實分任其志同也或稅市厘商賈以濟其贏餘或毀境內淫祀以供其土木日積月累至嘉靖十七年乃舉事焉大成殿五間東西兩廡十四間櫺星門神道樓明倫堂東西齋俱備垣墉凡高數仞歷惟四月厥功告成雖輪奐之制自古爲然而營繕之功於今爲盛諸士子藏修游息待時達道此其基也高之心其盛矣哉庠生孫承德石階以其事走白於余屬爲文以記之余里去青城甚邇嘗聞其政矣亦見其人矣因嘉高之政而重一子之請於是乎記

重修明倫堂記

按察司
副使 韓一右 邑人

青城邑本狹僻原無志書學校修立之詳備載碑記可考而知也予自成童獲與子員列時雖未有卓識觀學宮規模知當初因便草創不暇爲恢宏之制耳戊戌筮仕來每過家謁學禮先師孔子見學宮崩圯日益甚焉心竊慨之邑侯唐半江就予謀曰敦化善俗莫大於學校明倫堂傾廢乃如此生徒何以庇司訓者何所依以爲教吾責也欲撤而新之如勞民何予曰公以湖廣名科宰敝邑廉靖不擾百廢俱興士被陶鎔民安撫字且連歲豐稔比諸鄰邑爲最所謂以佚道使民民將不怨學校尤士大夫之所嘉樂者公當毅然爲之於是遂請帑銀掄材鳩工始事於癸丑年九月迄役於去年三月其先三楹今擴之爲五

楹夫青城立邑久矣學校舊矣科第間或有人仕宦率不久以顯識者謂其故可推也大段人傑則見地靈地靈則出人傑予觀明倫堂輪奐視昔大加宏壯百餘年間機會賴侯有以崇尙作新之卽今儒生濟濟踰踰較之三五年前實倍五分之二以地以人兩相成矣將來士類繁興科第雲仍士宦赫弈以顯吾邑以鳴我國家之盛侯之勳名流傳百代有餘光哉是役也縣佐韓九疇尉馮熙皆與有力焉庠生吾兄一左偕顧廸等咸謂余曰斯不可不記予乃直書以志歲月俾後世知明倫堂所以重修云

重修廟學記略

知府 陳應薦 邑人

青城廟學創於永樂間重修於嘉靖壬午歷數十年未有以更
新之者鳳陽李侯剖符來臨顧征輸孔棘積牘盈筭荆榛遍野
流離踵接侯乃悉政理勤恤民瘼越歲宿弊剷除逃移首邱歲
登課最卜吉鳩工捐貲以供經費而工役則責諸公務之曠者
省其罰而庸其力經始於乙亥四月丙子十月告成戟門丹碧
交輝宮牆外望大觀壯矣殿廡輪奐胥美百官體制宏矣敬一
亭去故即新佩服莊誦聖制崇矣啓聖祠移亭之東市廛囂遠
幽靈妥矣明倫堂正頓簷壁園橋拱聽授受肅矣庠門擴而東
之風氣爰通雲路闢鐘樓建鋏石固基洪聲遠徹文運翊矣以
至牆階路砌煥然一新邑博武陽李君遼沈君暨庠彥徵予以

記予惟學校國家急務作新營治幾不容緩但勤期會者急簿書憚改作者便目前不有賢侯廢孰與興泮宮稷下千載重光士之懷瑜握瑾而不思立德立言立功以表於斯世者未之有也予惟事難於創始而功尤貴於相因侯已虔其始行將列諫垣登台輔後之繼侯者心侯之心政侯之政則青人被侯之澤永無既矣侯家世濟號肖濱行高五絕政擅十奇蒞任三載百廢俱興善政未易縷舉行當有觀風者陳于朝太史氏記之無容贅也姑書此以復諸君子之請

修天佛寺記略

青城治東十里許有廟世傳爲古刹創始無考廟左有碑乃至

正十六年霍贊立進進魯鐸所述也題爲東嶽行宮內云前此已二百餘年廟號天符亦不知何義成化間僧知善等竊議天符之號邇之不知其時窮之不知其義乃會衆說而易之以天佛蓋自釋迦入中國佛教始行於東土已而宗分派別象教益廣演三車而開覺路使人人各認本性佛之恩以宏矣繫佛於天不亦可乎遂榜其門曰天佛弘治間寺僧德相遊海州遇定禪與之語悅甚遂攜歸居數載喟然曰號謂天佛而殿象寂無其于名何有遂於弘治癸亥毅然興念建殿宇設象不踰年而成定禪棲霞人高僧也

鐘樓記

知縣 沈紹代 安州人

嘉靖甲子予治青之明年也適當大比之期先是形家言謂庠之東起一峯科甲必不乏庠生范經邦等請於予建之以勵士志予駭且疑曰第不第學也遇不遇時也專以地靈求之而人不傑可乎僉曰吾輩雖非人傑竊有志焉而賴以助之耳予曰是或一道也即覓善識風水者試之云東南巽也巽龍頭也起一樓臺於北北拱極南向離東朝海西對秦聚四方秀氣而翁發之人文宣朗菁莪兔置之咏將在是予曰信哉斯言也可急爲之遂命工鳩材將計日而成未幾八月終放榜而于子禴適獲捷焉觀者莫不喜其明效大驗若是鄉士大夫助者益衆於十月十日告成其勢巍然壯景運也其簷敞然散宏聲也其色

麗然象文明也其隅整然毓正直也其盤闕然敦教化也其基
苞然示久道也無非以興起斯文爲意使後之觀者惕然思策
然勵欣欣然向學成人有德小人有造爲國家光爲天下禎者
悉自斯樓起之樓其有功於青之斯文者乎予故樂而述之以
記歲月云

漏澤園記略

明工部
主事

喬

縉
洛陽人

漏澤園者瘞埋遺骸之域也初宋元豐間陳向以度支員外郎
出使開封行宿陳留佛寺夜夾垣外洶洶若人聲起燭火四望
積體遍野皆貧莫葬之委骨惻然哀之建白請地以葬神宗可
之乃俾總其事因哀駭八萬每坎三千爲梵剎歲令一僧掌其

籍國家因之洪武十七年令天下立義塚先於赤城築園以葬
髑骸越數十年事廢大參知邢公表抵東藩之明年移檄郡縣
命以興復青城令王君嵩以進士出宰首先承檄啟創於邑西
里許買地經營廣袤四畝周以垣蓋豎以居楔蔭以樹植峪以
門扁曰漏澤工訖起書徵余記余惟仁人君子平其政俾有後
者喪葬有禮而無主遺骸鰥寡煢獨與死於道路者以爲之櫟
櫟以葬否則寒聲泣霜弱影弔月而鬼無所歸昔文王得死人
骨而葬之天下聞之曰西伯澤及枯骨況於人乎曹褒爲校尉
見無後不能瘞愴然置地以葬月令孟春掩骼埋胔令邢公以
西伯爲心而王君承之又以類曹褒之事率普惠治窮其所必

至周其所不及融液浸漬以不墜聖王掩骼之政俾久廢復興
既仆復振殆中行獨復者歟使天下參知如邢公尹邑如王君
性天地之帥體天地之塞滂太和於西間流生意於羣品雨暘
寒燠氣時氣節舉獲以正而天下其平乎是用記之以告四方
之執政

建青城縣孝子義婦節婦碑記

知縣謝源三山人

正德壬申冬孟月予奉命來蒞茲邑時逆賊甫平城池堙圯民
物蕭條予心患之因爲修葺之計板築旣興公餘讌父老僉曰
斯邑雖小而死節殉志之隆亦可嘉也予亟叩其姓名曰劉漸
楊倫邑庠弟子員子漸父榛被執漸請以身代賊不恤遂父子

俱亡倫之妻崔氏遇賊欲刼以從倫義不辱將殺之妻崔氏泣求以身代賊怒砍之幾死守南門者民王玠與弟璦俱奮勇對敵志慕張許賊衆從東門入玠遂死之璦亦重傷卒又有陳策氏少熟弓馬守東門莫敢當其鋒賊怒共擁衆攻之策佯走反射數十人後獨力難支遂被害妻孫氏收其屍禮葬亦哀毀不食自縊而身死若人者如劉則不失爲孝子如楊如玉如陳則不失爲義士若崔與孫則雖古貞烈不是過也而父老輩嘗亦舉於有司而聞諸朝矣但未獲成命也君子成人之美司風化者其可不爲之旌表以勵其俗哉予聞父老之言輒景仰不已每欲作節孝傳重請命以耀其閭奈憲臬臺省差委旁午予走